

**1289-1289- OFP - Acta Capitulum Generalium apud Treverim Celebrati**

In nomine patris et filii et spiritus sancti. Amen.

Acta capituli generalis apud Treverim  
celebrati anno Domini · M° · CC° · LXXXIX° ·

Confirmamus has constitutiones. In capitulo de apostatis. ubi dicitur. fuerit restitutus. addatur. que restitucio non fiat per eosdem; ante tres annos ad minus. Et hec habet tria capitula.

Item hanc. In capitulo de domibus concedendis. ubi dicitur. hac eadem districtione precipimus. usque ad illud. ordini committatur. deleatur totum et dicatur sic. prohibemus districte. ne quis recipiat curam predictarum nisi per tria capitula continua fuerit approbatum. et nisi cura predictarum per dominum papam ordini committatur. Et hec habet tria capitula.

Approbamus has. In capitulo de inclinacionibus. ubi dicitur. ad antiphonam salve. addatur. et in missa in prefatione. Et hec habet · ii · capitula.

Item hanc. In capitulo de domibus concedendis. ubi dicitur. nulla domus concedatur nisi a priore provinciali. addatur. vel eius vicario. Et hec habet · ii · capitula.

Item hanc. In capitulo de electione prioris provincialis. ubi dicitur. et quacumque ex causa. deleatur. et. et ponatur. vel. Et hec habet · ii · capitula.

Item hanc. In capitulo de electione prioris conventualis. ubi dicitur. vel in electione provincialis. addatur. aut in priorem provincialem nullatenus eligatur. Et hec habet · ii · capitula.

Item hanc. In capitulo de electione diffinitorum generalis et provincialis capituli. ubi dicitur. per disquisitionem prioris provincialis. addatur. vel eius vicarii. Et hec habet · ii · capitula.

Item hanc. In capitulo De itinerantibus. in fine ubi dicitur. nisi per magistrum vel diffinitores capituli generalis. addatur. si conversus fuerit. privetur omni voce in accusationibus aliorum. et ubique novissimum locum teneat. nisi per magistrum ordinis et diffinitores capituli generalis fuerit restitutus. ei nichilominus penitentiam faciat gravioris culpe. Et hec habet · ii · capitula.

Item hanc. In capitulo de predicatoribus. ubi dicitur. in dyocesi illius episcopi. addatur. nisi ex causa rationabili. Et hec habet · ii · capitula.

Item hanc. In capitulo de studentibus. ubi dicitur. nisi fuerint revocati. addatur. postquam autem in aliquo studio per tres annos fuerint commorati; ipso facto sint ab illo studio absoluti. nisi de licencia magistri ordinis specialis. et hoc idem circa studentes eiusdem provincie observetur. Et hec habet · ii · capitula.

Item hanc. In capitulo de studentibus. ubi dicitur · iiiior · provincie scilicet. Provincia. Lombardia etc. deleatur et dicatur sic · v · autem provincie. scilicet Provincia. Lombardia. Romana provincia etc. Et hec habet · ii · capitula.

Iste sunt inchoaciones.

Inchoamus has. In capitulo de domibus concedendis et construendis. ubi dicitur. si quis vero contrafecerit; pene gravioris culpe debite subiacebit. deleatur et dicatur sic. si quis vero contrafecerit; gravior puniatur.

Item hanc. In capitulo de rasura. ubi dicitur. rasura fiat. deleatur totum et dicatur sic. rasura vero fiat a pascha usque ad festum omnium sanctorum; de quindena in quindenam. a festo autem omnium sanctorum usque ad pascha; de tribus in tribus septimanis.

Item hanc. vi provincie scilicet. Hispania. Provincia. Lombardia. Romana provincia. Theotonia. Polonia dividantur. ita quod quelibet earum dividatur in duas. si vero omnes relique provincie vel alique ex ipsis exceptis Grecie et Terre sancte dividi voluerint et pecierint; in eodem · iiiio · capitulo. in quo hec constitucio fuerit confirmata. quelibet earum modo simili dividatur. Quam divisionem magister ordinis et diffinitores capituli generalis immediate sequentis. postquam hec constitucio fuerit confirmata. facere teneantur et faciant secundum modum eis tradendum a singulis provinciis dividendis. quem modum ipse provincie dividende tradere teneantur infra nominatum capitulum immediate sequens post confirmationem predictam. Et si alique provincie in modum divisionis non concordaverint; duos fratres mittere teneantur et mittant. qui in dicto capitulo generali referant magistro et diffinitoribus capituli generalis; que circa divisionem viderint expedire. Quod si modum divisionis infra predictum tempus memoratis magistro et diffinitoribus non presentaverint; nichilominus predictus magister et diffinitores ad divisionem procedant; et nomina ipsis provinciis divisim imponant. Provinciis autem divisim illa provincia. ubi primo fuerat conventus fratrum; retineat locum suum in capitulo generali. relique vero provincie post provinciam Grecie in choro dextro. et post ultramarinam in choro sinistro quelibet habeat locum suum. ita videlicet. quod novus provincialis Hispanie sit primus post provinciam Grecie in choro dextro et novus provincialis Provincie sit primus in choro sinistro post provinciam Terre sancte. et similiter omnes provinciales alii collocentur. Si autem aliquis prior provincialis petitus fuerit in priorem a maiori parte alicuius provincie. cui magister ordinis et diffinitores nomen imponere habeant; remaneat prior

provincialis illius provincie. nisi eis aliud ex causa rationabili videretur. Et quicquid in constitutionibus divisioni contrarium vel dissonum inventum fuerit; magister et diffinitores generales capituli sequentis. postquam hec constitutio fuerit confirmata; corrigant vel immutent. et in capitulo de domibus concedendis. addatur in fine sic. hec sunt nomina provinciarum ordinis talia et talia. expressis nominibus singularum. et addatur sic. et priores provinciales hunc modum ordinent in capitulo generali. Primus in choro dextro post magistrum ordinis provincialis talis provincie. secundus; talis provincie et sic de singulis. in choro vero sinistro; primus provincialis talis provincie; secundus provincialis talis et sic de singulis. expressis nominibus singularum.

Item hanc. In capitulo de electione magistri ordinis. ubi dicitur. Parisiensis provincialibus etc. deleatur usque ad illud. teneatur quam cicius intimare.

Item hanc. In eodem capitulo. ubi dicitur. provinciales vero · xii · provinciarum. deleatur totum et dicatur sic. provinciales ergo predictarum provinciarum. etc.

Item hanc. In eodem capitulo. ubi dicitur. tres de prioribus provincialibus. qui inter alios priores provinciales · xii · primitus habitum nostre religionis susceperunt. deleatur · xii · et dicatur sic. tres de prioribus provincialibus. qui inter alios priores provinciales habitum nostre religionis primitus susceperunt.

Item hanc. In capitulo de electione diffinitorum capituli generalis vel provincialis. ubi dicitur. statuimus. quod in singulis annis in singulis capitulis provincialibus. deleatur usque ad illud · iiiior · fratres. et dicatur sic. statuimus. quod in singulis annis in singulis capitulis provincialibus talis et talis provincie expressis nominibus · iiiior · fratres etc.

Item hanc. In eodem capitulo. ubi dicitur. statuimus enim per duos annos in dictarum · xii · provinciarum capitulis. deleatur · xii · et dicatur. in dictarum provinciarum capitulis.

Item hanc. In capitulo de capitulo generali. ubi dicitur. predicti vero · xii · provinciarum diffinitores. duobus annis. et priores provinciales tercio anno. deleatur · xii · et dicatur sic. predicti autem provinciarum diffinitores duobus annis. et priores provinciales tercio anno.

Item hanc. In capitulo de studentibus. ubi dicitur. tres autem fratres tantum mittantur Parisius de provincia ad studium etc. usque ad illum locum. ydoneos ad studendum. deleatur totum et dicatur sic. duo fratres tantum mittantur Parisius ad studendum de provincia tali et tali. expressis nominibus universarum. Cetera vero provincie. quamdiu remanserint indivise; ad illud studium possint mittere tres studentes. Quatuor autem provincie scilicet. provincia in qua [est] conventus Montispessulani. in qua est conventus Bononiensis. in qua est conventus Coloniensis. in qua est conventus Oxoniensis. provideant. ut semper in aliquo conventu ydoneo sit generale studium et solempne. et ad illum locum quelibet provincia. que potest mittere duos studentes Parisius; habeat potestatem mittendi tertium studentem. que autem potest mittere tres studentes; potestatem habeat mittendi ad illum locum duos fratres ad studendum. Et si studium generale in aliqua provincia alia a predictis fuerit per ordinem assignatum; idem modus circa missionem studencium observetur.

Item hanc. In capitulo de predicatoribus. ubi dicitur. provideant diligentissime priores. ne committant predicacionis officium. addatur. vel confessionis vel lectorie.

Admonemus et districte iniungimus. quod studentes provinciarum in studiis generalibus necnon et ceteri fratres. quantum eorum officium et occupationes permittunt; vadant ad scholas et audiant lectiones. et ibi remaneant nullam vagam occasionem querentes exeundi. nec portent alios libros nisi illos qui ibi leguntur. et quod surgant ad divinum officium cum conventu. et priores et eorum vicarii; puniant acrius transgressores.

Item. Inhibemus districte. ne fratres litteras vel cedulae seu alia quecumque memorialia legant vel transmittant vel sibi transmissa aperiant; sine suorum superiorum inspectione vel licencia speciali.

Item. Quia discursus irregularis et inutilis quam plurimum ad capitula generalia vel provincialia veniencium. qui non sunt de corpore capitulorum. in ordinis turbacionem. et proximi deedificacionem. expensarum inutilium effusionem. et ordinem nostrum gravat. et dissolutionem inducit quamplurimam. ideo inhibet magister ordinis et ordinat de assensu diffinitorum. ne aliquis qui non est de corpore capituli generalis sine licencia magistri ordinis speciali veniat ad capitulum generale. nec ad capitulum provinciale sine licencia speciali magistri vel prioris provinciales. si autem aliqui contra hanc ordinationem fecerint; ultra penam in constitutione debitam. sint per annum omni voce privati. nisi in accusatione propria.

Item. Cum insolencie crescant non modicum ex defectu correctionis in multis conventibus et incauta combinacione ac fratrum combinatorum separacione. mandamus et districte iniungimus prioribus et eorum vicariis. quod insolentes corrigant et compescant. et discrete fratres combinent. nec fratres combinati se separent. quin ab invicem videantur et sibi possint testimonium perhibere. Et si quos transgressores invenerint et severius non correxerint; ipsi priores seu eorum vicarii. per vicarios prioris provincialis vel visitatores acrius puniantur.

Item. Monemus. quod admoniciones et ordinationes capitulorum generalium et provincialium quater io anno ad minus in quolibet conventu legantur et strictius observentur. et visitatores inquirent et corrigant transgressores.

Item. Vult magister ordinis et monet. quod fratres qui habent certa miracula et probata. que de novo evenerint de beato Dominico sive de beato Petro martyre. conscribant diligencius et curent quam cicius magistro ordinis intimare.

Item. Districte iniungimus. quod preceptum magistri ordinis. datum de consilio diffinitorum. in virtute obediencie. in capitulo Burdigale celebrato. anno domini · m° · cc · lxxxvii · a fratribus universis diligencius observetur. scilicet quod in alquimia non studeant nec doceant nec discant nec aliquatenus operentur nec aliqua scripta de illa sciencia teneant. sed prioribus suis restituant. quam cicius poterunt bona fide. per eosdem priores prioribus provincialibus assignanda. et qui contra fecerint et deprehensi fuerint et convicti; preter penam inobediencie carcerali custodie mancipentur<sup>1</sup>.

Item. Monemus. quod ordinacio contra inductiones et inducentes facta in capitulo Burdigale celebrato anno domini · m° · cc° · lxxxvii; arcus observetur<sup>2</sup>.

Item. Iniungimus prioribus et eorum vicariis. quod constitucio de non equitando. nisi in casu necessario ab ipsis et subditis arcus observetur. et literas testimoniales. ab hospitibus non notis. qui ad ipsos declinant; inquirere non obmittant. et ipsi eisdem ostendere teneantur.

Item. Iniungimus prioribus universis. quod cellas in quibus sunt lecti. taliter ordinent et disponant. quod katedra. lectus et pulpitus clare a transeuntibus videantur. et hoc teneantur facere infra mensem; postquam hec acta receperint. alioquin ieunent singulis septimanis una die in pane et aqua; quousque perfecerint.

Item. Monemus. quod in conventibus. ubi vestes debent distribui fratribus; loco vestium pecunia non distribuatur. sed prout facultas domus portaverit; unicuique provideatur.

Item. Iniungimus prioribus universis. quod non permittant conversos habere lata scapularia in scapulis scissa et dimissa. ad modum cape clause. sed prout dicit constitucio induantur.

Item. Admonemus. quod priores provinciales et eorum vicarii. non faciant mutaciones; nisi ex causa racionabili.

Item. Declaramus. quod ad magistrum ordinis vel ad priorem provincialem non possint ire fratres; sine prelati sui licencia speciali.

Item. Declaramus. quod solus magister ordinis et priores provinciales et eorum vicarii; possint dare licenciam recipiendi episcopatum.

Item. Cum conventus Parisiensis multis debitis in pecunia sit oppressus; volumus et ordinamus. quod provincie induant suos studentes. et illi qui sunt de gracia. vel de conventibus illuc missi ad studium predictum; induantur a suis conventibus vel amicis. quousque status illius conventus fuerit melioratus<sup>3</sup>.

Item. Volumus et ordinamus. quod quilibet frater hospes. qui ad illum conventum declinaverit. post secundam diem sue hospitalitatis singulis diebus. quibus moratus fuerit. solvat unum Turonensem album procuratori. nec volumus quod prior. vel eius vicarius. vel procurator. in hoc dispenset cum aliquo.

Item. Cum facultas se obtulerit de testamentis vel de aliis casibus. studeant fratres illi conventui subvenire.

Concedimus provincie Provincie; · i · domum. provincie Theotonie; · ii · provincie Polonie; · ii · unam ponendam in regno Bohemie. alteram in Polonia. provincie Ungarie; · ii · provincie Grecie; · i ·

Item. Volumus. quod letania more solito dicatur in profestis diebus. Absolvimus priores provinciales Lombardie et Ungarie. Item absolvimus priores conventuales Hyspalensem. Ysnacensem. etc. Volumus. quod priores absoluti hoc anno in capitulo generali in eisdem provinciis et conventibus. ad eadem officia; nullatenus resumantur.

Capitulum generale sequens; assignamus Ferrarie in provincia Lombardie.

Actis additae sunt litterae magistri ordinis; cf. app. n. XL.